

## DOMENIE IX «VIE PAL AN»

### Antifone di jentrade cf. Sal 24,16.18

**V**oltiti de mê bande, Signôr, e ve misericordie,  
parcè che o soi bandonât e puar.  
Cjale il gno aviliment e la mê pene,  
bute lontan di te ducj i miei pecjâts.

### Colete

Diu, che la tô providence no fale in ce che e à destinât,  
ti preìn a schene plete  
che tu slontanis di nô dut ce che al pues fânus mâl  
e tu nus dedis dut ce che nus confâs.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Dt 11,18.26-28.32

**Jo us doi vuê une benedizion e une maludizion.**

Dal libri dal Deuteronomi

Mosè al fevelà al popul disint: «Chestis peraulis che us dîs, metêtlis tal vuestri cûr e te vuestre anime, tacaitlis te vuestre man come un segnâl, tal vuestri cerneli come une bende.  
Cjale mo: jo us doi vuê benedizion e maledizion. Benedizion se o ubidîs ai comants dal Signôr vuestri Diu che us doi vuê; maledizion se o disubidîs ai comants dal Signôr vuestri Diu, se si slontanais de strade che us ordeni vuê, butantsi cun altris dius che no ju vês nancje cognossûts.  
O tignarês a ments e o metarês in pratiche dutis lis leçs e usancis che vuê o met denant di vualtris.

Peraule di Diu.

### SALM RESPONSORIÂL dal Salm 30

**R.** Tu sês tu, Signôr, la crete che mi pare.

Li di te, Signôr, o voi a parâmi:  
che no vedi di jessi deludût par simpri.  
Deliberimi te tô justizie.  
Slungje viers di me la tô orele. **R.**

Anìn svelt a liberâmi;  
viôt di jessi par me une crete che mi pare.  
Parcè che tu sês tu la mê crete e la mê fuartece;  
par rivuart dal to non tu mi indreçarâs. **R.**

Fâs lusî la tô muse sul to famei;  
salvimi pal to boncûr.  
Sù mo, fasêtsi coragjo,  
ducj vualtris che o vês fede tal Signôr! **R.**

### SECONDE LETURE Rm 3,21-25.28

**L'om al è justificât midiant de fede, cence cjalâ lis oparis de leç.**

De letare di san Pauli apuestul ai Romans

Fradis, cumò, lassant stâ la leç, si è pandude la justizie di Diu, testemoneade de leç e dai profetis; la justizie stesse di Diu midiant de fede in Jesù Crist, che si slargje sun ducj chei che a crodin. Di fat no esist plui difference: ducj a àn pecjât e a son cence la glorie di Diu, ma a vegnin justificâts a gratis

par un plasê di Diu, in fuarce de redenzie che si cjate in Jesù Crist. Diu lu à destinât publicamentri come propiziatori, midiant de fede, tal so sanc. Nô o pensìn che l'om al è justificât midiant de fedence cjâlâ lis oparis de leç.

Peraule di Diu.

### CJANT AL VANZELI Zn 14,23

R. Aleluia, aleluia.

Se un mi vûl ben, al metarà in pratiche la mê peraule, al dîs il Signôr, e gno Pari i volarà ben e o vignarìn li di lui.

R. Aleluia.

### VANZELI Mt 7,21-27

La cjase fate sù sul cret e la cjase fate sù sul savalon.

Dal vanzeli seont Matieu

In chê volte, Jesù al disè ai siei dissepui: «No ducj chei che mi disin: Signôr, Signôr, a jentraran tal ream dai cîi, ma chel che al fâs la volontât dal Pari gno che al è tai cîi. Une vore di lôr mi disaran in chê dì: Signôr, Signôr, no vino forsît profetât intal to non? Tal to non no vino parâts fûr demonis e no vino fat tal to non une vore di miracui? Alore ur al disarai clâr: No us ài mai cognossûts! Lait lontans di me, vualtris che o fasês dome robatis.

Chel che al scolte duncje chestis mês peraulis e lis met in vore, si pues metilu a pâ di un om di sintiment, che al veve fate sù la sô cjase sul cret. E colà jù la ploie, a lerin fûr i flums, a svintarin i aiars: si butarin parsore di chê cjase ma no colà. Di fat e veve la fonde sul cret. E chel che al scolte chestis mês peraulis ma no lis met in vore, si pues metilu a pâ di un om cence sintiment, che al veve fate sù la sô cjase sul savalon. E colà jù la ploie, a lerin fûr i flums, a svintarin i aiars: si butarin parsore di chê cjase e chê e colà e la sô ruvine e fo grande».

Peraule dal Signôr.

### Su lis ufiertis

Confidant tal to boncûr, Signôr,  
o vignìn al to altâr sant cui nestris regâi  
par che, purificâts de tô gracie,  
o podìn jessi smondeâts cui misteris che o celebrìn come tiei servidôrs.  
Par Crist nestri Signôr.

### Antifone a la comunion Sal 16,6

Jo ti clami, Diu gno, ma tu rispuindimi.  
O soi sigûr che viers di me tu slungjis lis tôs orelis:  
scolte ce che ti dîs.

### O ben: Mc 11,23.24

Us al dîs in veretât: dut ce che o domandais te preiere,  
crodêt di vèlu za vût e us sarà dât, al dîs il Signôr.

### Daspò de comunion

Daspò di vênus nudrîts cul Cuarp e cul Sanc di to Fi,  
tegninus sù cul to Spirt, Signôr,  
par che ti testimoneìn no dome cu la peraule e la lenghe,  
ma ancje cu lis oparis e la veretât  
e cussì o podìn jentrâ intal ream dai cîi.  
Par Crist nestri Signôr.